

甘泉鄉人稿

甘泉鄉人餘稿目

卷一

與梅會里徐硯芬翁林衡書

與蔣寅昉論詩書

記孟子讀本

跋詩經疏義刻本

跋宋律

跋朱思本九域志不全稿

跋宋本小字晉書

跋晉書評校本

跋明周若年仿宋秘閣本晉書

跋晉書音義

跋張子簡所鈔汲古閣影宋本酒經

跋吳氏伯與歷代宰相傳

跋蔣氏所藏鈔本草堂詩箋

跋梁氏中孚重刻宛陵集

校史記雜識

跋李實盒說文檢部

跋明神宗時秀水縣貧戶冊

跋濮陽彝齋所藏百川學海

跋隋榮澤令常醜奴墓誌

跋重裝陝本廟堂碑

跋常文烈公重刻歐陽小字千文

跋摹刻唐石廟堂碑

二則

跋徐季海多寶塔碑額

五則

跋朱海曙所藏多寶塔碑

二則

跋舊搨麓山寺碑

跋陳襄夔所藏何氏蘭亭

跋吳牧騶所藏甄塔銘

跋曉庭所藏洛神十三行

跋馬券碑舊搨本

跋顏魯公撰書茅山道士李元靖碑殘石搨本

跋陸放翁與僧仲玘手簡搨本

跋沈曉滄郡佐所藏張楊園先生遺墨冊

跋曹孺巖先生集杜詩冊

跋朱梓廬先生仙家詩意圖

跋林文忠公父子手札冊

跋穰園圖

跋石門許夢亭柳溪圖

胡仁圃詩稿跋

續節孝祠編跋

附與劉月臨札

書顧竹賢爲戴禹舟作海行圖序後

跋王松厓爲蔣翁寫聽泉圖

題馮童子爲蔣拜彤篆大富貴亦壽考六字

爲蔣寅昉書扇題跋

十則

跋自書金剛經心經

跋自書阿彌陀經

文端公臨蘭亭卷後附臨一通跋

二則

郭溪三先生祠記

桐鄉縣沈氏五世同堂記

漱山檢書圖記

蔣氏祭堂墓圖記

篤慶會記

記外祖祖母墓祭事

蓮漪文鈔序

沈蓮溪詩序

平湖蔣竹音

槐

詩序

徐晴江遺稿序

秋窗讀畫圖題詠序

蔣母節孝曹安人五十壽序

金岱峯八十歲重宴鹿鳴序

陳笏魚

縉

詩稿題辭

牟冊如大令

溫典

小像題辭

四品銜兩淮候補鹽運使司運判馬君家傳

鷹硯銘

又銘

洮石硯銘

蔣氏月池硯銘

摺疊竹扇骨銘

卷二

閑心靜居詩

甘泉鄉人餘稿卷一

嘉興錢泰吉輔宜

與梅會里徐硯芬翁

林衡書

與硯翁別二十餘年矣今年李實齋館小齋出觀所爲硯翁八十壽序言里中若葬親惜字恤嫠諸善舉皆硯翁董率之爲人謀事雖艱阻期必成祁寒暑雨不少避泰吉日洪範五福一曰壽四曰攸好德蓋好德者天使之然則天之福祐自必予以長年以任其所好而使之錫福一鄉之人也是可爲翁壽矣實齋曰硯翁先世本閩中林氏六世祖演溪先生當國初時自海昌遷梅



會里翁嘗思訪求海昌志乘以悉家世本末未能也憶  
二十年前翁偕吾師介石徵君過學舍卽語及先世事  
後纂備志徧訪舊家譜牒思補所未詳而州之徐氏無  
有言本爲閩中之林者獨州志循吏傳言莆田林氏初  
遷黃巖成化閒名尙顯者避地杭州贅邑之鳳凰里徐  
氏因蒙其姓三傳至永安知縣輅字鳳橋以循吏著稱  
乃知尙顯爲徐氏變姓之祖也後讀梅里詩輯見演溪  
先生詩稱韋庵庶常元粲爲兄攷之州志庶常爲鳳橋  
從孫則演溪先生亦鳳橋孫行也演溪先生與詹山庶  
常景同父兄弟詹山名亦見州志選舉而不言籍嘉興

則猶貫海昌也泰吉與翁同爲縣學生而食祿海昌幾三十年佐翁訪求族姓本末宜莫我若乃今得述所聞以相告俾辨定其然否延年樂事莫先於此矣又嘗聞吾師道尊大君孟亭先生與弟桑者翁承演溪家學並擅吟詠爲里中詩人之選思求索遺事以廣所聞見翁亦當樂爲泰吉詳道之勿憚乞言也乙卯五月廿一日

與蔣寅昉論詩書

詩不必拘唐宋宋大家未有不宗法唐人者也強分唐宋亦將強分漢魏與唐乎漢魏特未有近體耳若五言七言古體唐之大家亦何以異嘗有人見宋人詩輒指

目之曰此宋詩爾僕應之曰老杜集中宋詩多矣試細  
讀之聞者皆匿笑涪翁力追少陵生僻之境蓋欲自立  
門戶與坡翁爲勑敵不肯作蘇門君子也若當世無坡  
翁涪翁或不若此后山雖辦香南豐然亦自關門徑僕  
謂兩家皆非正軌固由性之所近亦因有所畏避而別  
尋塗轍也廬陵學昌黎而不爲所掩舜俞子美與廬陵  
鼎立一則豪放一則幽淡與廬陵迥不相同而各得其  
性情斯爲能自立者也半山亦學唐人而自成局面者  
也吾嘗謂善學唐人者莫若北宋諸大家南宋以後能  
自成一家者皆取法北宋而追蹤唐人者也晚唐多靡

靡之音此由唐人以詩取士故從事於詩者專以聲調求工本原之地薄矣猶今之作時藝者馳驚於時墨而於先輩繩尺皆置不講得榮名則有餘安能久遠哉學詩者若沈蓮溪之作時藝於諸家所長博觀約取斯爲善學者矣要之大家必有真性情以植其本原故讀詩必當讀大家全集觀其自少至老雖體格屢變而其真性情則數十年如一轍若性情所向朝夕異趣何取乎爲詩衍石兄謂詩所以持性情者蓋此也僕少日先人命讀少陵東坡兩家略知體格後自讀昌黎詩弱冠後得三家全集評本手自過錄稍識門徑雜以科舉之業

又喜泛覽未能專心學詩及至海昌以病廢不能吟誦  
於詩益疏足下以爲識途之老馬屢屢相問聊抒淺見  
以備采擇幸勿哂之

記孟子讀本

此本墨筆圈點爲宜興吳仲倫德旋讀本亾兒炳森所  
錄已將二十年矣今歲瑞安項几山傳霖手錄桐城劉  
海峰讀本相寄因以硃色錄於卷中世傳蘇老泉本嫌  
其太繁海峰則卷三以後太簡參以仲倫足啟發文境  
矣然仁者見仁智者見智善悟者各有所見終未能仰  
測乾坤之妙用也此猶以後人之繩尺裁度周秦之器

物自以爲得當而已咸豐乙卯十月望日識於海昌寓齋炳森已逾年應溥遠在都門諸孫未解文律心有所得無可告語回思十餘年前父子團坐燈下讀孟子時可再得耶

跋詩經疏義刻本

元朱氏公遷詩經疏義附明王氏逢輯錄何氏英增釋四庫所收爲正統甲子何氏英授書林葉氏刊本題曰詩傳義詳釋板心標詩傳會通何氏有後序今見蔣氏所藏兩本皆失何氏後序一爲書林安正堂劉氏重刊每卷標題詩經疏義會通一爲書林克勤堂余氏重

刊每卷標題詩經疏義淺講板心皆刻疏義余氏本似從劉氏本翻雕皆在葉本之後訛字不少如東山詩行枚傳有縵結項中此朱子用周禮大司馬注文也朱本傳文項中不誤注云諸本項作項誤兩本皆同幸所見元刻胡氏纂疏本項作項馮柳東見宋本亦作項乃知朱氏爲辨正項字作項之誤項作項下項字當爲頂字又云顛後曰項亦兩本皆同說文項頭後也顛字當爲頭字之誤若此之類倘得葉氏原本詳細校勘亦快事也

跋宋律

乙卯嘉平旣望偕仁和邵位西比部觀蔣氏昆季所藏  
經籍如入山陰道上目不暇給涉覽稍倦余方默坐位  
西忽於寅昉架上得一書連稱至寶至寶余驚異取觀  
則宋律也位西旣跋其尾屬余亦書數行余不讀書亦  
不讀律少無杜陵稷契之志今旣衰老益不能用坡公  
之言偶展此冊但驚爲目所未覩而已東坡生日書於  
五研齋屬寅昉多寫數本以廣流傳庶不負位西鄭重  
拂拭之意

跋朱思本九域志不全稿

生沐得此書屢詢朱思本爲何許人余瞠目不能答今



質之位西乃知爲元時道士羽流而能研究輿地之學  
視句曲外史更上一層矣

跋宋本小字晉書

余先世所藏明周氏翻宋大字本晉書聞里人有宋小  
字本思借以校對秘不肯出今乃得見寅昉所藏本位  
西亦歎爲精美絕倫問龍乞水歸洗眼欲看細字消殘  
年不知寅昉許我否東坡生日書

跋晉書評校本

此本評點爲戚氏寶研齋所藏不知何人之筆屢引彭  
羨門先生語當是康熙以後人道光戊戌命炳森過錄

評語自閏四月至十月而畢時炳森從事帖括列傳四十六王舒以後不暇分句讀遂爾閣置炳森初名銘恕卷末自署名是也歲甲辰更名應試得售屢應會試考補景山官學教習咸豐甲寅夏假歸省余於海昌城東寓齋十月以疾卒其所點讀通鑑紀事本末日知錄將傳授諸孫戊午己未冬春之交乃從蔣寅昉假殿本及余舊藏明周氏仿宋大字本點閱王舒傳至載紀卷末粗校一過以俟他日炳森之子有能讀父書者炳森爲吾兄學源先生後秉性淳厚而不永其年每檢遺墨彌深慨歎己未脩禊後二日六十九翁磨四十年前爲

炳森寫詩經讀本研忍淚書此

跋明周若年仿宋秘閣本晉書

天祿琳琅收此本謂前序缺末葉不知其名泰吉先世舊藏本序文幸全爲萬厯戊寅秋王世貞作後有俞某敘紙爛失其名每葉十八行行十六字每卷末附音義失錄楊齊宣序字大頗便老眼惜正文多誤字若載記李流傳卑字誤分爲二字賴音義可正姚興傳何故以一方下脫漏幾及四百字須以他本校補音義亦當從殿本細校衰齡疎嬾未能一一是正也全部朱藍二色圈點不知何人筆中缺良吏儒林二卷亦是舊鈔余

補錄音義於卷後

跋晉書音義

唐何超晉書音義晁陳兩家皆不著錄文獻通考遂失載毛氏汲古閣本晉書未及刻亦讀晉書者一缺事也何超之音天寶六年楊齊宣正衡爲之序胡身之通鑑注引晉書音義遂屬之楊正衡豈讀序文未審且不及檢唐志故有是誤歟唐志尙有高希嶠注晉書開元二十一年上在何氏前不知能勝何氏否何氏音略備而義多未及尙有待於後人補苴也

跋張子簡所鈔汲古閣影宋本酒經

蔣寅昉從鑪頭鎮沈氏假得汲古閣影宋本北山酒經  
三卷屬海鹽張子簡敬脩影寫帛月而成并摹毛氏收  
藏之印惟妙惟肖余至五硯齋寅昉出兩本並觀幾不  
能辨但紙色新舊異耳子簡爲余舊友受之長子童年  
患疽一足偏廢遂棄舉子業傳受之篆刻之學已能繼  
美今見此本真大隱翁所謂心手之用不傳文字雖酒  
人亦不能自知也三卷之末附神仙酒法有武陵桃源  
酒可以蠲除萬病令人輕健子簡倘得而飲之以愈沈  
痼則其才足以用世豈獨一藝之精壓其曹偶哉我於  
是書卜之矣

跋吳氏伯與歷代宰相傳

甲寅十月蔣寅昉以明吳氏所輯宰相傳貽我孫頤仁  
因謹錄 四庫提要於冊首提要謂序文題曰宰相守  
令合宙今本失序而亦無守令不知守令有刻本否  
四庫目中尙有魏氏顯國歷代相臣傳一百六十八卷  
元相臣傳十二卷視此當更詳備數十年來未見流行  
本此冊亦今始見之爾提要謂其以李斯爲禮賢尙德  
爲乖舛今李斯傳中無此語乃在季桓子傳中季孫斯  
李斯字形相近想館閣諸公未暇詳審遂爾涉筆幸見  
此書爲之辨明亦著書者之一快也丙辰七月十一日

記

跋蔣氏所藏鈔本草堂詩箋

草堂詩箋五十卷

編年詩四十九卷  
逸詩拾遺一卷

魯豈編次  
蔡夢弼會箋

外集一卷

酬唱附錄

海陵卞圖集

年譜一卷

魯豈撰有序

年譜一卷

趙子櫟撰

草堂詩話二卷

蔡夢弼集錄

後附跋敘杜氏譜系

宋蔡氏夢弼草堂詩箋

四庫未著錄近時張氏昂霄

博收舊籍其所編藏書志亦未有也往歲兄子炳森在京師於袁漱六編脩芳煥處見宋刻本後附我鄉先哲

魯氏嘗年譜託爲目所未睹馳書告余今寅昉得此舊鈔本實驚人秘笈也魯氏年譜之後又有趙氏子櫟年譜一卷據奏三大禮賦表謂工部生於癸丑舊譜謂生於壬子蓋差次一年然黃氏鶴年譜已辨定實生壬子趙氏之說存疑可也詩箋惜缺卷二十九卷三十袁氏所藏聞亦有缺卷他日寅昉得與漱六各補所缺實爲快事黃氏鶴分類千家詩注生沐收藏舊刻本余得合觀於五硯齋亦平生之幸惜炳森遽爲異物無此眼福思之泣然乙卯二月

跋梁氏中孚重刻宛陵集



兄子炳森得此於京師甲寅夏日攜以歸未幾炳森病  
歿遂不忍檢視近從濮陽春泉泐假所藏查梅史揆評  
閱徐氏刻本因取以對校詩文次第兩本皆同余舊跋  
言此本文僅十首誤也惟第四卷得餘干李尉書錄示  
唐人于越亭詩因以寄題七言古一首爲徐本所無三  
十一卷中誤編新息重修孔子廟記及雨賦三十二卷  
誤編小女稱稱甄銘二十一卷誤編劉原父同梅二十  
二飲永叔家觀所鈔近事五律一首亦兩本所同此本  
附宛陵續金鍼詩格前有元張師曾所編年譜後附錄  
爲宛陵所作詩文則梁氏增刻而徐本所無也梅史評

閱多訂正編輯先後之失次衰年憚於傳錄誤刻之字以兩本相校亦略可是正今亦未暇以爲益歎炳森在時之能助余爲不可得已丙辰中秋後六日

校史記雜識

咸豐六年丙辰二月廿七日唐端甫茂才仁壽攜示陶書估所持史記集解索隱每葉二十八行行二十五字與中統本同而字略大前有三皇本紀史記正義序及正義諡法解第一行俱有豐城游明大昇校正新增十字蓋增中統本也正義惜未能補刊游明本王懷祖先生讀書雜誌及之亦明刻之佳者書估以爲元刻索價

甚昂不能得而細校漫記之 九月望後游氏本爲蔣寅昉所得余假至寓齋惜補鈔五十餘葉甚惡書估云有重殘本可更換後數月以重殘本來亦未能補全游明本從中統本出同邑沈廉仲宗濟亦有中統本因假以參校前所未審者略得審定七年爲寅昉校刻詩集傳羅氏音釋秋冬之交乃得計日校史又多作輟八年八月十九日始畢一過 蔣寅昉旣得游明本史記集解索隱又得兩正德本卷首皆有正義論例證法解列國分野與游本同皆有中統時董浦序一本董浦序後有皇明正德仲夏吉日慎獨齋新刊本記

計十三字但有年號無紀

年

一本董浦序後有正德戊寅年重校正刊行木記

十

字

有長汀李堅序所謂校正者卽慎獨齋之本也今取

以參校兩本實一本校正本惟去慎獨齋本之圈隔句

讀耳其脫誤處皆未改金臺汪諒延柯氏維熊校刻今

人皆稱柯本亦徒有其名耳余前後校史記幾及二十

年尙未正定前人倉卒刻書甫校一過卽付剞劂安能

盡善耶雖宋本亦不能無誤職是之故戊午八月二十

二日記時年六十有八

正義論音例惟維遺唯

並音佳

反

各本佳皆誤佳獨正德兩本作以佳反不誤此亦可

謂一字千金矣

戊午八月廿六日以明南雍本校論例以佳反與正德本同亦可喜從字下又

音祖容反與所見各本異餘則大略相同

舊借汪氏所藏柯本多補鈔之

葉戊午八月假得蔣生沐所藏紙墨極精完好無闕因

補校前所補鈔之葉柯本大都與評林本同凌氏謂以

宋本與汪本

卽柯本

字字詳對不誣也秦藩本多與王本

同 屢見柯本正義論例至列國分野皆缺豈柯氏所

刻本無歟俟再訪問 生沐所藏王本錄葉石君校卷

一尾有康熙廿年歲辛酉八月二十八日葉石君從宋

刻大字本校起二十四字 葉校甚略所見宋本與王

本當亦無大異今錄余所未及校者數條已未四月朔

記 細閱終卷知葉校但有正文及集解生沐云從杭

州諸進士洛過錄本錄出其他校改之處不知何人所校亦不言據何本於王氏正文注文甚誤之字已改十之八九今亦錄之凡不著葉校者皆是也 生沐自詡所藏王氏本爲真王本今與家藏王本細細對校實一刻間有不同者當是脩改 余初校柯本時從寅昉假秦藩本參閱歲甲寅寅昉重購秦本以贈炳森未幾炳森下世不忍取閱庚申春發興以秦藩本細校二月初甫校正義論例卽聞省垣告警急收藏書籍三月初移置先塋丙舍中自此無靜定之日秦本亦不可再見友人屢勸余纂校勘記亦嘗有手寫本所愧學問疏淺未

能正定時寫時置今所寫之冊亦多棄置且以爲師資者嘉定錢氏高郵王氏錢塘梁氏之書亦皆棄置惟手校評林本及汲古閣本尙在行篋衰病眼花舊時校字不能審視此事遂已矣同治壬戌四月望日識於江西新建縣鄉時年七十有二 日本刻史記評林板心上有寬文壬子年刻六字下有八尾友春四字皆陰文每行字旁多細標識若中國詞曲譜首冊讀史總評後附王弼州所錄短長說日本後西院寬文僅二年靈元代立前十年不改元明年改元延寶壬子爲靈元不改元之末年當

大清康熙十一年

咸豐丁巳二月見蔣生沐藏本記其大略於別冊擬暇時借校今生沐書

盡爲盜燬生沐死矣思之泣然庚申十二月望記於借蔭居

跋李實齋說文檢部

遵康熙字典以筆畫排次說文部首視胡荊圃翁字源均表尤便檢尋全錄校長之文則功力十倍矣實齋新婚市月寫成此冊我知閨閣中有鼎臣楚金家法乃能不讀玉臺新詠效秦徐之贈答也

跋明神宗時秀水縣貧戶冊

濮陽彝齋汾新得左氏百川學海每帙前後裝綃之紙爲秀水縣貧戶冊有秀水縣印有委官典史江夢熊名



考之志乘江夢熊歙縣人萬厯十二年任十七年霍邱王悌代之是時知縣爲漳浦陳九德富順郭如川府志官師皆有傳郭侯傳云萬厯十四年知縣事歲薦饑加意賑恤全活以萬計則此爲郭侯時冊無疑矣鄉圖之名尙存者有麟謔鄉陸區伍圖陸區柒圖皆云去縣貳拾里思賢鄉西區拾叁圖拾伍圖貳拾貳圖叁拾壹圖皆云去縣叁拾伍里東區下扇玖圖云去縣貳拾伍里麟謔今府志作麟瑞志謂思賢麟瑞二鄉其半屬嘉善縣蓋始於宣德析縣時此爲萬厯時冊當與今所管同不知區圖尙有改易否翳此殘牘之冊得附舊書留之至今其殆郭侯之仁政實

有愈久不可泯沒者而江君之名存焉其亦能不負委任者歟因屬彝齋裝之成冊而誌其後蓋不獨爲吾鄉掌故之一端也丁巳冬日

跋濮陽彝齋所藏百川學海

余所藏百川學海爲世父戶部公所賜石門吳氏黃葉邨莊藏本中缺七十餘葉五十年來所見本皆同蓋是書之殘闕久矣今年秋彝齋得此本余所缺者皆有之因得假鈔實爲晚歲大快事其前後裝褙之紙爲明萬厯時秀水縣貧戶冊則此書裝訂已閱二百餘年彝齋用余言以貧戶冊別裝而余爲之跋將與是書並藏勿

失云

跋隋榮澤令常醜奴墓誌

顧亭林金石文字記謂此志在興平縣崇甯寺嘉定錢竹汀大興翁蘇齋偃師武虛谷諸先生皆有跋尾而青浦王氏金石萃編未及收豈偶未見歟六舟旣補阮儀徵兩浙金石志若搜采所得廣及於寰宇以補王氏之遺此其一矣蘇齋於此志屢稱之謂結體適緊無齊梁魏周之習而開虞歐褚薛之體又謂不著書人名而實在丁道護啟法寺碑之上余近讀蘇齋集心慕此志因從六舟假觀惜刻字淺細眼花手弱不能摹錄一通以

備考證如入寶山空手而歸也蘇齋又以北齊樊遜書孔廟碑與此並稱安得彙集諸碑與虞歐各家參觀以微窺由晉及唐楷法之宗派耶

此志高約今尺一尺二寸廣稍殺二十七行行二十七字第十三行首缺八字又二字模糊十四行首缺六字又二字缺半十五行首缺三字第二十六行第三子吏下缺字計十格二十七行第五子下缺字計十二格第五行十行十七行十八行十九行下俱缺一字不知亭林及諸先生所見本得無殘闕否惜皆未錄全文無從考核

跋重裝陝本廟堂碑

余鄉未有廟堂碑道光庚寅李春湖侍郎贈余重摹唐本始篤嗜之張君鵬孺乃贈此陝本命工裝褙暇日從陳少山假其高祖文簡公臨摹全文核對又以城武本合校兩本互缺之字廿餘年來時時展閱冊幾敝矣今春督工重裝而以覃溪先生鉤摹百廿字附於後此本雖失後小塊然是精搨友人所藏未見勝此者安得舊搨城武本與之相配耶咸豐丁巳四月

永興有隋大業九年行書所撰高陽郡隆聖道場碑見趙氏金石錄今不得見此碑尙存賴有宋人重刻

耳

跋常文烈重刻歐陽小字千文

此爲南陔中丞自兩浙江南鹽運使擢安徽按察使時  
手贈於石門舟次閱數年來撫吾浙旋調任湖北遂殉  
難石刻不知得存否中丞視余甚厚欲以文字相報未  
能成今檢此冊不勝感舊之思當與李春湖學使所贈  
重刻廟堂碑並藏兩刻流傳浙中無數本余幸皆得之  
亦可謂奇遇矣咸豐戊午四月

跋摹刻唐石廟堂碑

二則

翁閣學鈞摹唐石廟堂碑百廿字跋云尙存千四百許

字李侍郎重刻本跋云尙存千三百許翁跋在嘉慶十二年丁卯李刻在道光六年丙戌相距不過二十年又闕百許字何耶今以百廿字鉤本校之可得言焉得字夫其道也也字降迹司寇寇字皆重刻本所無永歎永字屯亨通有通字皆未泐損是以補闕惟多士伏膺膺字泐損處鉤摹本刻本不同或鉤摹本傳寫之失否則不應重刻本轉清朗也咸豐十年六月鄉居無聊展帖消愁并以道署望日晨起書此

翁閣學集中跋廟堂碑唐石本云通計全石二千十七字而其真唐刻者已千有四百八十五字其餘湊補者

僅四之一耳則康里氏本實以他本湊成全文閣學審定千有四百八十五字爲唐石爾李侍郎於閣學鈎摹本有觀款且自跋刻本云嘉慶丁卯春用油素細意雙鈎成冊卽閣學初見康里本之時也重刻時不應闕失或又經審定更刪去百許字耶是日又識

跋徐季海多寶塔碑額

五則

徐季海多寶塔碑隸書題額世多失搨王司寇金石萃編跋謂舊唐書稱其工草隸又云工楷隸而不言工篆書引新書按詰妄作符命事以證其能篆書則誤以此額爲篆矣余曾得近時搨本幸存題額今得此舊搨未



斷本重裝梅會里李實盒兄文杏時館余齋爲摹搨題  
額不爽毫髮惜所得本實字碑字紙有脫爛不知石上  
若何倘得舊搨更倩實盒摹搨實蕭齋大快事也乙卯  
重九識

季海父嶠之字惟嶽正書行書適媚有楷法金石錄唐  
永豐陂堰頌開元七年徐嶠之撰并八分書此季海分  
書之淵源也季海長子璠次子峴皆工筆法金石錄並  
收其石刻昔人謂唐之工書者三葉嗣名惟徐氏云九  
月旣望

季海分書嵩陽觀聖德感應頌爲天寶三載在此題額

之前碑在登封縣嵩陽書院當訪求搨本

後數日歸里於集上書肆見王良常跋感應頌搨本市者居奇余以裝潢後脫失數字且失搨褻迴題額不果購藏良常謂感應頌分書清圓疎古玩此題額亦可想見十月朔識於海昌寓齋

十月十三日海昌朱海曙廣文元炅以其弟漁璜大令元呂十餘年前自陝中攜歸精搨醴泉銘及此碑見贈此碑額亦精搨寶字碑字斷缺與余舊所藏同惟碑字卑下一畫猶存其半舊所藏紙爛故不全耳

跋朱海曙所藏多寶塔碑二則

此爲吳江周蓮塘尙書舊藏本咸豐乙卯十一月朔泰  
吉借觀於閑心靜居回憶四十年前尙書督學浙江時  
屢握衣進謁惜未及請問筆法今衰朽無成以臨帖遣  
日對此懔然

余近得舊搨多寶塔碑意甚自得因借海曙所藏各本  
對核此冊椎搨尤精輒思以缸面酒飲之咸豐乙卯仲  
冬五日甘泉鄉人識於硤川蔣氏之五研齋海曙適至  
杭州遲日見此定當止酒

跋舊搨麓山寺碑

三十年前族子恬齋方伯贈余命工精搨本岳麓碑以

較金石萃編所錄者已殘缺七十餘字則不住則字

口寺主寺字皆靜慮演成靜字成字而非法缺非

法二字何以發聲下缺披揚宿志四字詩書以下

缺重而雅俗四字其詞曰缺詞曰二字詞首缺天

地有象口賢建極宴坐九字後代襲武前良作則缺

襲武前三字人天口下缺香鬼神賜四字大啟禪

房下缺其二二字石林雲起缺起字月窺窗裏花

臺隨足缺月窺窗裏花五字既往在此缺既字比

明齊哲缺哲字連率順風缺連字口馳口絕下缺

其四二字碑口莫建軌物未宏缺碑莫建軌物未六

字以訪無能惟石可口缺無能惟石可五字大廣

開元缺唐元二字十八年下缺歲次庚午九月六字

英英披霧其德允燦一行僅存德允二字燦字火旁

滅此孫退谷藏本余從蔣生沐假觀較金石萃編增多

一百七十餘字視近搨實多二百五十餘字真罕觀之

本也故耆閣下多取於安定者已茲寺八字元同下

多是字林壑肅穆下多不字未真上多相事

本也故耆閣下多取於安定者已茲寺八字元同下

多是字林壑肅穆下多不字未真上多相事

澄明化成六字 地位嘗下多高字 除結下空三格  
多與存半炎漢太宗長沙長清八字 分跟下多表之  
明詔行矣水泉有刺殘十字 信尙敬下多田字此字  
新編本有或聞下見字存半新編亦如此貝葉上有納  
字此字新編亦有 法界圖下多於字 禪師者下多  
迨字 故能下多門字 搦文如是以文義推之當是聞  
字 順下牧伯上多其風觀者探其道七字 因差別  
而非法下多隨品類而得根去二八字 咸下形勝上  
多以字 披揚宿志下多者也司馬西河實七字 雅俗  
賢遠下多識器守岳四字 師長下多闕字 雅俗  
多自輿以明而至道不八字 歸心淨土下多膜拜佛  
乘推橋慢之八字 之難下多紀字 天下多護字 其二  
是依雲鷲是式一想冥十字 人天下多護字 其二  
下多幽口左豁崇山右峙瞰八字 千里玉下多水字  
雲起下多雷激庭際四字 比明齊哲下多佛日環  
照牛車結轍八字 欽烈下多訪道追勝形五字 馳  
下多目字 碑下多板字 無能惟石可下多久與山  
不崩其五七字 九月下多王子朔十一日壬戌建九  
字 英英披霧上多口且上計於京不偶茲會贊曰十  
一字 標下多舉明略雄辯縱橫神情照灼備聞政理

深悟禪樂十九字

又

文後有且上計於京不偶茲會

有江夏黃仙鶴刻五字

贊曰英英披霧云云按新唐書文藝傳邕自遵化尉徙

澧州司馬開元二十三年起爲括州刺史後歷淄滑二

州刺史上計京師則此贊語當爲撰書碑後數年之筆

武授堂金石跋所錄碑陰文亦多贊詞似效北海者而

授堂不言碑陽有贊則亦未見上計於京以下之文也

授堂又言守潭者名在碑陽獨彥澄字存則司馬西河

寶公名彥澄之文亦未見也授堂得見碑陰蓋由目驗

倘見此舊搨有彥澄之姓與列銜并得上計於京之文

必詳加考證惜乎授堂與述菴侍郎皆不及見也述菴

謂碑嵌亭壁甚固碑陰所題今不可見生沐倘仿得舊  
搨未爲妄庸人題名損壞者必更有授堂所未見之字  
余且夢寐思之矣

跋陳襄夔所藏何氏蘭亭

此本後有居易堂印驗之徐侯齋先生書畫所用者適  
相符合則爲明季 國初搨本無疑矣十年前周次軒  
自東陽歸贈余一本有一白堂三字是新搨者不逮此  
本遠甚蔣生沐有楊大瓢之弟石公藏本搨在此本前  
泐文及剝蝕處亦相符合但墨色較舊神味較勝耳惜  
祇十八行尙少一石此爲全璧可貴也丁巳花朝識於

五硯齋

跋吳牧騶所藏甌塔銘

唐人碑刻雖極秀媚皆有端凝肅穆氣象令人愛而生敬翻刻者秀媚易傳而端凝肅穆之氣象十不得一二余所見唐碑大都如此而王居士甌塔銘爲尤甚近若馮柳東許珊林蔡鹿賓方外友六舟皆精心鉤摹然取元刻對閱總覺不逮今見牧騶庶常所藏明人翻刻本則魏公嫵媚卽見於正襟抗論時廣平賦梅花而其心似鐵真佳刻也冊後牧騶集字成楹帖十餘聯亦深得東坡所謂端莊雜流麗剛健含婀娜之意李實盒攜至



寓齋展玩數日因識數語以質牧騶

跋曉庭所藏洛神十三行

余十年前得十三行曉庭不以爲佳余心憾焉後數年曉庭得此本洵爲舊搨之精美者今同客姚江各藏篋中取以對校實是一刻但先後異時搨手高下不同耳避亂奔竄稅駕何所各有其寶未知能否分別妍媸亦殊多事張叔未嘗與蔣生沐辯論碧玉白玉今亦無此暇日矣辛酉五月十日

跋馬券碑舊搨本

我鄉宣公祠馬券碑不知刻於何時明末經亂缺失順

治甲午陸氏已嘗補刻其後又散置迨乾隆甲午南海  
梁大令森始購合之運置嘉興縣學流虹亭畔今所見  
者皆乾隆以後搨本也青浦王氏金石萃編據以著錄  
而附見四川眉州蘇公祠石於跋文中則舊刻實罕觀  
矣六公得此帖謂石刻近在我鄉初不以爲異及取近  
搨細審之不獨所闕山谷書中二十八字此本俱全卽  
行款疎密鋒穎映帶處亦多不相同其爲我鄉舊石與  
眉州石本未敢臆定要之爲明以前搨本無疑信可寶  
也咸豐乙卯夏至後六日六公攜新舊本至寓齋相與  
校核因爲跋尾

常不繼將不能爲此馬御以如富貴之家輒曰非良馬也故不售夫天廡此二十八字梁大令購合時已闕金石萃編錄全文而不言闕亦一疎也因附誌之

跋顏魯公撰書茅山道士李元靖碑殘石搨本  
魯公此碑唐石久已缺失乾隆壬子嘉定錢辛楣宮詹言之汪稼門制府檄句容學官搜尋於玉晨觀牀竈階砌間及民家書案得二十三片計存一千四十餘字其完全者僅七百七十有六字築石臺於觀中以存舊蹟此本凡完全者六百四十一字較之乾隆壬子搜得者

尙少百餘字殘石所搨難於排次學書者但取筆法不以文字先後顛倒爲嫌也後有是碑乃顏公舊蹟藏於茅山人莫知之好古者求而出之其書法真爲國寶特陵谷變遷不能無遺三十八字不知何時人跋語亦集魯公大書爲錄金石家所未及邵武楊渺滄翁藏此有年嘗屬爲之跋忽忽未果渺翁歿已逾年乃踐宿諾噫自金陵兵燹後句容屢被蹂躪王晨觀不知無恙否展玩此帖不獨爲渺翁感愴云

已未五月廿六日

跋陸放翁與僧仲玘手簡搨本

此爲放翁與智者寺僧仲玘手簡面署大中大夫寶謨

閣侍制提舉江州太平興國宮陸游謹封攷之年譜嘉泰癸亥放翁七十九歲正月除寶謨閣侍制四月乞致仕除提舉江州太平興國宮旋歸知此十一月八日手簡乃嘉泰三年家居時也渭南文稿中智者寺興造記尾署嘉泰三年十月二十九日蓋文成未十日卽令人寫本寄仲玘且許爲手寫勿令他人書正月四日手簡已爲書丹猶以留滯爲愧而謂碑上切不許添一字古人文字鄭重如此蓋下筆輒以千載自期不獨放翁爲然也又數通不署歲月殆前後數年筆態度在蘇黃間邵武楊渺滄翁兆琮早歲在其弟金華縣齋掃此以藏

甯居偶詠相畀卽得讀自題仙家詩意圖之詩今歲文  
孫生白茂才奉圖屬題泰吉已將及先生畫圖之年矣  
詩學久廢有負先生之教謹錄先生自題詩於圖後先  
生晚年書多自署手戰然腕力益邁勁泰吉拙劣之手  
何敢爲先生充膾錄生竊觀卷中先生自跋爲吉雨兄  
所錄幸附猶子之列雖書法不類或亦先生所恕也  
圖爲同邑陳健行翁乾所畫陳翁父子於嘉慶己卯應  
泰吉之請爲摹直廬問寢圖巾月始就視王鏡香居士  
元本毫髮不爽今在從弟慶善處此圖今若倩人臨寫  
恐亦難得此好手矣泰吉又識

跋林文忠公父子手札冊

林文忠之却贈遺公之恒德也諸君子爲納贖鍰則情之可受者也讀文忠父子手札令人益懔懔於取與之義而公艱貞之德夷險一節亦可想見余至海昌唐君夢蝶已出遊不得見今眉生廉訪出示此冊亦足見其嫩行廉訪不沒夢蝶之善并存文忠訪夢蝶後人之札知拳拳於夢蝶既沒之後亦可誌也

跋穰園圖

余與海鹽胡衣谷父子交有年矣一日見衣谷所藏陝本廟堂碑視近搨迥殊欲爲榮咨道而不可得衣谷曰

此我曾大父穰園先生時時臨仿之本也穰園者先生  
購別業爲講學地失之久矣惟五十歲所寫小像而其  
友吳侃叔明經爲補景得寶藏以當園圖也先生行事  
汪學博能肅旣爲之傳矣余聞先生之女夫陸泐山文  
學言先生生平與汪君傳文一一符合文學少從先生  
受經義後乃締姻也泐山曰先生終身與人無所忤數  
十年教授生徒列庠序者甚眾節脩脯資建宗祠置祀  
田而未嘗一事干縣令侃叔明經謂和其光而不同其  
塵者其此之謂歟又曰胡與吳爲同姓先生受經義於  
蘭陔大令而太沖孝廉侃叔明經皆同志之友年四十



卽自稱老人太沖爲作穰園老人歌其後十年乃有此圖又三十年而卒嘉慶二十年也穰園藏書數萬卷今無存者廟堂碑余幸得見之汪君謂先生書學虞永興益信其不誣云海鹽第宅園林見於志乘者若舊時月色樓方洲草堂獨寤園白鶴園之屬雖多荒廢人猶稱之而徐氏之小瀛洲則爲我先人唱酬之地今爲縣倉其圖聞尙在不得一見老子所謂天地尙不能久也而有不若飄風驟雨之倏盡者豈獨文章著述之美乎於戲觀先生之爲人穰園不朽矣園距通元寺三里而近胡氏外今無以文學著稱者衣谷與其子穗生皆精篆

刻名流請乞無虛日穗生屢爲余鐫器物名尤相善乙卯四月

跋石門許夢亭柳溪圖

咸豐丙辰冬石門許君午莊奉其先君子夢亭先生柳溪放櫂圖介余族孫馨山屬爲題詠且謬愛余文欲爲夢亭先生作傳余與夢翁嘗相遇於友人蔡硯香所午莊亦得見於小硯武林寓齋今蔡氏父子俱下世當日文酒之樂幾如隔世而夢翁賢子午莊欲顯揚其先人勤勤不已文孫亦得繼踵庠序是圖爲許氏世守之寶何待他人文字哉夢亭先生美行不可殫述敬養寡姊

垂五十年識勞宜生大令於童稚時以女妻之此尤卓  
卓在人齒頰者余衰老久廢文字乃識大畧於圖末俾  
後之觀是圖者想見夢亭先生之高風不獨放浪江湖  
逍遙塵外之樂也

胡仁圃詩稿跋

嘉慶甲戌之秋余始識仁圃於我家之葯房遂訂交自  
是仁圃屢應會試歸輒過從余言動有失仁圃必微言  
規戒不少恕余嘗謂我友之善規我過者錢塘吳鯨邨  
而外以同里張堯民及仁圃爲最深切蓋時憶規過之  
言數十年未嘗一日忘若評隲詩文不爲虛譽則相與

訂交時要約之一端也今趙實軒與仁圃及門諸君子校刊遺稿友人沈蓮溪旣序之矣余於蘇邨堯民仁圃之遺著不能傳錄嘗著其大畧於曝書雜記實軒欲刻余雜記中論仁圃語於詩稿之末因附識數語以見余不能傳播執友之遺著老而無成蓋不獨有愧於實軒矣

續節孝祠編跋

海昌之有節孝祠編舊矣然閱十年或數十年始一編次蓋歲報節孝婦女勢有限斷不得覃及也自國家推廣恩例定府縣合建總坊之制於是有限方隅設

局採訪者雖窮鄉寒女亦得與旌揚之典誠甚盛事  
往歲余幸厠學官纂脩備志以列女事屬之曹杏庭文  
學錦堂杏庭悉心任事凡同人所採訪旣臚列其事實  
不濫不遺更取舊族之譜細心采輯以是得列志乘者  
不下千餘人歲己酉辛亥余與學正董君以備志年例  
已符及續采婦女附總局請旌得旌者七百二十  
九人又以年例未符者一百十九人請學使吳侍郎給  
扁以表其閭杏庭纂輯祠編付梓已誌其大畧矣其後  
又以舊志及備志未旌者一千二百餘人附總局請  
旌格於吏議屢易冊籍逾歲始得達部及咸豐四年

亦曾造冊今又重造亦牒州詳府并求照及爲感泰  
於此等事非敢要名求福不過期免廿餘年無事坐  
食之咎耳大君子必亮其微忱也

書顧竹賢爲戴禹舟作海行圖序後

禹舟昔歲航海之役自二月初至十二月始歸假令無  
風濤之險寇盜之虞而茫茫大海中離其親戚閱月逾  
時其驚悸憂危已有夫人所難堪者禹舟遇險而夷蓋  
非獨天幸也年來 朝廷方賴海運以濟倉儲禹舟之  
記於海道誌之甚詳足以資考鏡夫豈獨一身安危之  
所繫哉機應於心而不挫於氣自古當艱鉅之任而克

濟者大都如此顧君竹賢之言所包者廣矣我故樂誌其後惜老矣不能與禹舟共涉波濤一試竹賢所謂勞身鍊骨之術觀是圖也惟有望洋興歎而已

禹舟名大川江蘇人以從九品投効安徽咸豐八年解軍器至處州請於大帥願率鄉勇殺賊卽至桃花嶺下遇賊奮擊被害年五十餘無子其航海時曾爲盜所刼縛遇救得免卒爲國殤得死所矣謹附誌之

跋王松厓爲蔣翁寫聽泉圖

此海昌蔣遠謨翁六十七歲小像畫者梅會里王潤松厓其祖斌師周爲張瓜田徵君寫戴笠圖著於畫徵錄

師周之子鏡香居士肇基爲先曾祖畫直廬問寢圖松  
厓鏡香從子也能傳家學晚歲爲先從兄學山廣文及  
余合貌渲染猶工細咸豐辛酉秋翁孫光煇與余同寓  
慈水奉示此圖余得見翁在此畫前數年至今猶想見  
其閒適之境後二十餘年見王君悉其家學今及見翁  
與王君者無幾人矣因識畫側俾蔣氏子孫知老人雖  
一時寄興之事亦必託之好手爲不苟也

題馮童子爲蔣拜彤篆大富貴亦壽考六字

余避地慈湖得與馮薇史文學往還其子守曾甫十一  
齡見其作逾尺字腕力健勁因語守曾杜少陵壯遊詩



自述云九齡書大字有作成一囊古人早慧而大成要當讀書破萬卷也守曾日習魯公家廟碑亦喜仿李少溫篆額因屬篆此六字以贈拜彤須知富貴壽考亦惟汾陽之功業爲不負耳願其勉之

爲蔣寅昉書扇題跋

十則

鄉居兩月容膝易安不敢作廣廈想偶檢香山居士香鑪峰下草堂記爲寅昉節錄二百字近地數百里未嘗無此銷夏之所而能體甯心恬如香山者幾人哉松杉叢灌何地無之不必草堂也

四十年前嘗至潤州不及訪米老遺跡以爲憾事實昉

曾暢遊金焦今亦踰十年矣烽火屢警迥異昔時思之

惘然

臨襄陽  
丹徒帖

鮮于伯幾遊記墨蹟爲表弟吳鐵琴所藏余四十年前  
屢得展觀近歲得困學齋遺研乃宋坑之絕佳者想見  
磨墨作書時興致不淺惜不得墨蹟並藏以配遺研茲  
從鐵琴所刻養雲山館法帖臨仿數行爲寅昉清賞七  
十老翁尙思補作少年工夫可笑可笑

宋紹興時集禧河南字爲封禪頌名碎金帖族父堯石  
宗伯公所藏今在公曾孫剛中所咸豐庚申四月寅昉  
屬寫便面爲節臨八十餘字弱筆不足觀所幸農家春

收豐稔寓客飽啖豆麥暇輒弄筆自娛觀於鄉而益知  
膺受多福也

坡公自言憂患之餘乃始學道余近雖屢書養生論實  
未學道叔夜蓋亦不足言學道寅昉以爲然否

余以避兵移居非若淵明之有素心人也幸爲先人邱  
墓之鄉宗族親戚咸來會集時得情話寅昉肯來則有  
賞奇析疑之益矣樂數晨夕企予望之爰錄此詩以當  
招隱

咸豐庚申正月得坡翁雜帖於硤石市肆有承天寺遊  
記末刻二印一曰字彥平一曰包衡私印乃吾鄉明季

布衣以所藏上石布衣有春帆什遙青閣蒿園茗遊諸  
集檣李詩繫錄其所作此石見在張叔未解元家新脩  
府志錄入金石門叔未無恙時屢相過從惜未談及今  
得見此舊搨實大快事實昉能借搨百十本分贈友朋  
亦吾鄉一勝事干戈擾攘時忽忽未暇此願恐難卽償  
四月九日臨此以當左券

閒靜之樂隨處可得何必山中余居鄉已將六十日碌  
碌如在塵市偶就北牖隙光爲寅昉寫便面胸次略覺  
清淨六十日中若此者數日耳前此六十九年如是如

是

錄鶴林玉露  
山靜日長語

素不敢作草書茲爲寅昉臨此雖偶然欲書而不解使轉之法纔一握管卽情怠意闌有乖無合無怪思過手蒙百齡俄頃可歎可歎

道光庚寅李春湖侍郎贈余重摹唐石本廟堂碑畧知永興面目今三十年矣無畫腹之勤焉得筆髓寅昉屬寫便面率爾操觚雖有百餘字不足以易一頭芋一勺麻敢望銅硯之報耶

跋自書金剛經心經

大興翁覃溪先生楷書金剛經依壽春永慶寺石本南無金剛藏菩薩下數行爲南海吳荷屋中丞榮光補書

桐鄉曹馥堂別駕韻玉得墨本與陳蓮汀所藏梁山舟  
學士心經同刻石余得摹本極精避亂藏篋中辛酉二  
月自沈蕩鄉移寓豐山發願寫一通藉以收心非敢祈  
福甫經發筆卽聞海鹽縣城失守烽火之警豐山左右  
皆及所居幸無恙居停逃避不得已與俱稍定歸寓旋  
又盡室放船如是者屢矣無事時卽寫數行閱兩旬乃  
畢不知夢幻泡影能如露電之速過否三月旣望識

跋自書阿彌陀經

香光爲蓮池大師寫佛說阿彌陀經海昌陳氏刻入玉  
煙堂董帖余曾臨摹數過衰年手腕不靈彌覺拙鈍然

避亂寫經冀滌煩惱字之工拙不必計也春間在豐山  
陶氏寫金剛經正值烽火幸能卒業自謂尙有定力茲  
又寫此經不知後之人能歡喜信受否辛酉七月五日  
識於慈谿縣城之校士館

文端公臨蘭亭卷後附臨一通跋

二則

先曾祖文端公乾隆丙子八月病起時臨蘭亭序歸安  
吳平齋觀察雲收藏有年矣平齋好搜金石文字蘭亭  
尤夥有二百蘭亭齋金石記行世寇亂之後所藏多失  
此卷幸存咸豐辛酉十月旣望兒子應溥侍余避亂至  
上海與平齋相遇因舉以贈先公臨此帖時年七十一

泰吉幸及先公臨帖之年得見遺墨竊不自量擬於卷  
尾亦臨一通附以示後十一月下浣乘海船江行十二  
月初至江西新建縣鄉借應溥婦家程氏之屋暫安老  
幼冬寒殊甚不能握管今年新春病作困臥兩月幾殆  
春盡始能起坐立夏後一日積雨初晴心神稍暢乃滌  
硯磨墨臨摹及半次日始足成之所攜蘭亭在案上者  
適有東陽何氏本渤海藏真本雖參用兩本欲爲虎賁  
中郎亦未能也惟稽遲數月必待病起之後始償斯願  
殆亦有數存焉因覩縷記其顛末俾應溥慎藏勿失先  
公有神或式憑之庶幾子孫能寶守云同治改元歲在



壬戌四月十一日

文端公曾藏玉枕蘭亭新篁里張叔未解元得公命陳履安精搨本泰吉詳著於清芬錄中屬叔未弟子張受之雙鉤敘文及右軍小像并公與胡學林翁手柬謹藏於篋往歲海昌蔣生沐光煦屬海鹽胡衣谷摹刻敘文持贈搨本今玉枕不知流傳何所張氏所藏搨本及蔣氏刻石兵燹之後俱不可問敝篋幸存謹摹一通於卷尾俾後人知先公平時所愛玩倘見搨本可收藏也望後三日謹識

郭溪三先生祠記

一邑之城市各祀其鄉先生昉於漢郡國房祀實取法乎禮家所謂國故也時或正祠祀除房廟猶必著於詔制曰其先賢及以勲德立祠者不在此例蓋發潛德之光存不刊之烈雖言行有文質施設有廣隘而宣風後代宜在祀典莫得而廢也咸豐六年海甯州郭店鎮祀其鄉先生明蘇秉衡秉貞兄弟及沈君湘岸於興慶寺文昌宮之後軒屬爲之記余曰宋時鹽官令魏伯恂建議祀張公九成施公德操楊公璇於學宮曰三先生祠此官斯土者爲所部立祀也孔北海之於甄子然臨孝存其故事也今郭店鎮之祀蘇君沈君則鄉人自祀其

所愛敬也蜀人王商之於嚴君平李仲元其故事也所以使後之人知以行義風節相矜尚而有所觀法則其義一也請顏之曰郭溪三先生祠而諡於諸君子曰昔長樂劉氏之釋祭法也謂法施於民者民賴其法成身者也以死勤事者忠於國者弗顧其生義於君者不惜其死祀之則忠義勸於天下矣二蘇先生詩名重於景泰時邵薦不就以蜚遯終後之人以蘇先生爲法知所以淑其身矣沈先生當明之季以諸生爲義長卒冒鋒刃後之人急同仇之義思爲國家平寇盜其亦聞沈先生之風而有所感奮歟合而祀之所謂事有勸於當

時義無隔於異代者也誠諸君子以示邦有斯人足耀  
四遠之義也善乎哉或曰蘇先生目覩土木之難憂時  
憤世時見於詠歌沈先生從學於查東山孝廉亦嘗以  
文藝名使易地處之未必不同也特所遭異耳余曰然  
乃記其事以詔來者

桐鄉縣沈氏五世同堂記

古尚書說之於九族也謂上自高祖下至元孫之親蓋  
古昔盛時必有一人之身及見高祖下逮元孫者不獨  
放勲得親高祖與元孫之親也孔冲遠拘於昏必三十  
遂謂人年九十始得曾孫高祖元孫無相及之理此不

必遠徵古事以與之辨難也我朝旌表壽民壽婦有親見七代八代者固甚盛事而未屆百齡五世同堂者往往見於章奏傳爲美談若道光二十九年桐鄉縣鑑頭村沈鐘虞軒年六十一得有曾孫上事九十歲壽母魏恭人五世雍雍聚順一堂此余所親見其旌表者也昔我鄉邛庶子事母孝芝生堂下其還鄉養母也年八十餘矣傳記雖不言其及見曾元而王右丞送往唐州詩有百口寄隨人之句則其子孫眾多可知矣虞軒事母孝而子孫眾多其有庶子之遺風歟其在易曰受茲介福于其王母晉之六五爲陰之至尊有王母之象

六二以貞吉上應而受福此虞軒之所以善成母德也  
又曰鳴鶴在陰其子和之中孚之九五以實應九二有  
孚至感通之義虞軒與其子汶以至誠相應和而感孚  
其子孫雖隱德不聞而物无勿應有必然者余與沈氏  
有連夙聞其門內之行所謂不言而躬行者蓋庶幾焉  
年來屢見虞軒之孫寶稼於其妻兄蔣寅昉所觀其馴  
行益信沈氏家法之美其所以累世康彊逢吉而得見  
高祖元孫之親者非偶然也故樂爲文以貽之雖然余  
之文何足重崑山歸氏高元嘉慶堂顧文康公嘗爲之  
記余求其文不可見世之人豔稱歸氏世有厚德得饗

高年者乃因服習震川之文而時時想慕若登其堂而親見其吉祥壽考之符也寶稼喜購善本書潛心研究其亦思震川所以承先人之志而成世德之美者豈獨文字之足以動人哉是在沈氏諸君子之能自成其名以論譔顯揚者相與勉之矣

漱山檢書圖記

數百年來三吳藏書之家名聞天下者相接踵然奉其先人遺籍藏之墓廬歲時往省整齊排比以寄其儉然愜然之思前此未有聞也今乃於海昌蔣生寅昉見之以視李公擇藏書於五老峯之僧舍其用意尤深遠矣

寅昉大父涇村翁墓在海鹽縣澈上雞籠山之麓丙舍  
軒敞面永安湖與我家湖天海月樓相峙也涇村翁延  
名師購善本書以教其子潞英霽峯潞英霽峯兄弟皆  
喜讀書又廣購之四部畧備三十年前余屢至霽峯之  
齋見其插架皆有用之書與之談論辨別精審余不逮  
也寅昉少孤賢母教之稍長卽知寶護遺籍籤帙標題  
謹守弗失今藏之丙舍者皆祖父之遺也記所謂思其  
志意思其所樂思其所嗜孰有大於此者乎錢塘戴醇  
士侍郎聞而稱善爲寫澈山檢書圖而屬余記之余嘗  
省先人之墓至澈上暇日登鷹窠山觀明季釋氏藏經



於雲岫庵輒歎茲山峭舉豈異積書之巖而吾儒力弱不敵緇流徒使羽陵宛委之勝結想於虛無杳渺之鄉山靈有知當亦騰笑今寅昉所藏非以誇卷帙之富也然自是勝侶來遊若楊廉夫孫太初之屬吾知必造其廬請觀古籍以擴聞見而後之誌漱水者當備列其事爲茲山增色也抑余更有爲寅昉進者夫父歿而不能讀父之書不忍讀也不忍讀者乃其能讀者也余及見蔣氏四世矣敦厚之風未有改也寅昉事事以先人爲法乃真能讀父書者也士君子觀於此圖而知其善承志意者又豈獨檢書一端也哉

蔣氏祭堂墓圖記

桐鄉縣王家村之原水道九曲環抱縈紆有佳城焉是爲海甯州蔣氏贈儒林郎涇齋君諱仁基候選布政司經歷春圃君諱星槐兩世合葬之墓涇齋君之沒也春圃君生甫五十日歸太安人艱苦鞠育三十五年以底成立嘉慶十二年以節孝旌春圃君配馬安人嘗剖肱以療夫疾及春圃君沒撫教異出子生沐以大其家余纂備志列女及士大夫爲馬安人傳誌之文皆可考信也初歸太安人爲涇齋君卜葬於桐鄉縣之辭家橋及太安人沒將祔焉啟兆蟻盈其穴春圃君懼不敢葬

改卜未成而沒生沐生甫十齡馬安人悲哀膺旁皇失措其弟兩如部郎爲相度區畫踰年乃成遂葬兩世時道光三年冬十二月某日也閱十有一年馬安人沒亦祔焉今距馬安人之沒已二十六年矣生沐與余言及其母猶有戚容且曰卜宅安厝子職也吾母旣克成先父之志昭穆以班使光煦得妥尊靈不煩卜筮請記其事以示後人夫改葬之文見於禮經其儀注則詳於開元政和之禮誠以託非其地棺物毀壞體魄不安孝子之心必有啼號罔極不勝憂懼者春圃君悲勞十餘年未得吉卜馬安人賴其氣之助能速成之可謂難矣昔

歐陽公誌張堯夫之墓嘗記夫人崔氏之賢教成二子始得改葬馬安人提攜藐孤卜茲新兆不震不驚無有後艱以方昔人所遭雖殊其難則一宜生沐寒泉之思數十年而益篤也吾知蔣氏世有厚德淳齋父子皆蚤歲不祿隱行弗耀終賴閨門之賢姑婦繼踵以彰內行之美以協正家之占慎擇宅兆其一端爾爰屬生沐仿古墓圖刊石祭堂爲記其事於墓圖之後生沐所生母劉亦以節孝旌克相大婦教成賢子方享大年康樂未艾生壙在女君之側禮也謹附記之

篤慶會記

篤慶者餘姚朱久香閣學蘭與其族人創建宗祠之樓也咸豐辛酉五月望前一日閣學之族祖山輝翁球七十生朝旣望讌同縣老人及子姓於樓前之堂余與族孫曉庭教諭聚朝異鄉避地得與斯會幸事也是會也戴翁鶴汀茂才聖涯年九十一嘗攷香山九老洛陽耆英胡公年八十九富公七十九爲最長無踰九十者惟睢陽五老則最長者畢公世長九十四方之古人茲亦勝事矣次於戴翁者黃兩香霖七十七耆英席君從之年也余七十一次黃君雖不敢上希王君貺論年則同也主人之年同於張昌言次主人者霞峯茂才灼六十

三閣學六十二少於溫公與會之年一二歲亦舊例也  
朱竹溪茂才璫五十七卓人棣五十六曉庭與卓人同  
最少者主人之子枕谷錯三十九蘭亭修禊少長咸集  
會稽故事也猗歟休哉諸君子或宦遊於外或久居一  
鄉雖出處不同皆有正業以教成其子孫表率於鄉里  
觀於今日之會敬老睦族兼有其義亦可見風俗之厚  
足以銷兵氣而尊鄉邦矣抑余更有所慨想者姚江名  
儒輩出功業若王文成自來講學家未有也吾意山川  
雄厚之氣篤生異人應時救世儻有戡亂如文成者庶  
幾旦暮遇之則浙西倒懸之民皆安衽席余與曉庭偕

歸故鄉亦當舉先世小瀛洲十老會永安湖書社故事  
廣延名流講論道德於寬閒寂寞之濱願諸君子不憚  
遠涉扶杖聯袂而來同坐賓席也爰爲篤慶會記以當  
左券曰篤慶會者乾隆時嘉善蔡氏有尊德會上海曹  
氏有敬承會皆尙齒之會也一時文人多歌詠其事少  
讀家集輒歎羨以爲不可幾及今乃與於諸老之列爲  
文以記其事所不辭云

記外祖祖母墓祭事

杜少陵與滎陽鄭宏之同祭外祖祖母文云宏之等從  
母昆弟兩家因依弱歲俱苦慈顏永違豈無世親不如

所愛豈無舅氏不知所歸泰吉讀之而有感於我外家  
之事也外王父沈苧村公外王母褚孺人墓在嘉興縣  
南五環洞橋內三里許

地名水達橋

先妣晚歲祭墓必與從

母徐太君偕嘉慶丁亥冬先妣謝世泰吉遵遺訓不敢  
廢自至海昌及前歲己未三十餘年每歲春日皆姨弟  
徐銘之墨林獨往行禮墓上有事必相聞篋存丁未小  
簡其最詳者也去歲春泰吉自海昌避兵至沈蕩鄉吾  
郡亦多遷徙及郡城陷墨林不知蹤跡此禮遂廢矣少  
陵文末云庶多載之灑掃循茲辰之軌躅蓋墓祭亦常  
行之泰吉阻於事勢軌躅難循傷哉泰吉老矣憶宋張



蘆川事不能不有望於後人張氏元幹蘆川歸來集後  
附幽崑尊祖錄記爲祖母外家置祭田事嘗讀 四庫  
提要而深有感焉蔣生寅昉乃從 文瀾閣傳鈔昇藏  
今存篋中事平之後倘能仿蘆川而綿沈氏之祀此則  
先妣所默佑者矣少陵文云外氏當房祭祀無主我長  
舅氏第四房孫二十年來稍能自振時往祭墓今不知  
流離何所郡城近地宰木聞斬伐畧盡泰吉匿跡數十  
里外遙望松楸更不勝慨歎云咸豐辛酉四月朔泰吉  
識於海鹽縣豐山東陶氏寓廬時年七十有一

長舅氏葭士先生莢泰吉長姑夫也舅氏及我姑附

葬外祖墓次仲叔兩舅氏葬在何所未能詳

蓮漪文鈔序

自來史家列傳多錄雜文劉知幾所謂更成文集者也志乘之書往往於卷末列藝文一門無關掌故者十且八九浮文妨要亦失體裁若別錄諸家遺文與志乘相輔而行則中州名賢文表金華文統之屬實可取法也汪謝城孝廉曰楨旣脩南潯鎮志因取近時十家未刻之文錄成八卷曰蓮漪文鈔謝城自湖州府城遷南潯賃居董徵君草堂故址因以名也余受而讀之施君國祁則余三十年前讀遺山詩注知其熟於金源舊事者

也楊君鳳苞張君鑑則夙聞其與纂經籍纂詁所采史漢三國之注爲詳審也孫君燮沈君珪之文則於吾友楊芸墅國朝古文彙鈔二集中得觀其大略然沈君論辨輿地考訂詳確之作芸墅未及見也若邢君典沈君登瀛紀君慶曾董君蠡舟丁君桂皆敦學行勤述作或窮老一鄉或早歲不祿遺著未行名不及遠非謝城之勤勤論著余亦不知其足傳於後若此也然則文鈔之作曷可已哉余初至海昌與潘梧君文學藹人約其錄海昌先哲之文及纂備志梧君已下世其稿散佚余所錄者惟五家未能續輯成編與謝城之撰著並行也

謝城於南潯遺籍搜輯甚富鎮志著作一門與管文學  
庭芬海昌藝文精詳相將蓋其胚胎家學博覽百家聞  
見既多采擇益審他日吳興一郡之文與弁山霅溪同  
其深秀而爲海內傳誦者必驚賞歎息曰非汪君編纂  
之力不及此於戲美哉此編肇之矣

沈蓮溪詩序

蓮溪旣梓行其大父又希先生詩集乃刪定所自爲古  
今體詩八卷屬余序之余童時於叔祖觀察公壁間見  
與又希先生合畫行看子叔祖爲言先生老於場屋境  
極困而胸次悠然無感慨不平之語所爲詩承古音之

家學以高淡爲宗及與會稽童二樹訂交講論益深所造益清曠余心誌之數十年乃今得讀先生之全集而益以知蓮溪詩學之自來也蓮溪少工四書文旣登高第數厯中外三十年名益重詩則以餘力爲之時出一篇輒壓曹偶蓋自其少時熟聞又希先生講論詩家之派別而母夫人機杼之旁一鐙課讀亦時及漢魏以來名篇巨製俾晨夕諷誦所濡染者深矣又其所著懷小編博覽經籍實事求是其辨證精密與唐宋雜考之書足以抗行故不必專力於詩植根旣深枝葉自茂昔人謂工夫在詩外者於蓮溪益信余總角之交大半零落

執友金岱峰遠隔千里逾時乃得通一書幸與蓮溪晚  
歲合并不異少壯爰仿先世舊事爲南郭聯吟圖以寄  
意然蓮溪之詩清新俊逸日出不窮而余才思久窒蓮  
溪有作不能屬和者屢矣何以序蓮溪之詩抑四十年  
前我兩人同居南郭金陀坊中暇則各出所作抉摘利  
病相戒勿爲浮諛之詞雖老不改也乃道蓮溪家學之  
本原及其得力之所在以告讀蓮溪之詩者且質之岱  
峰當亦同余斯言也咸豐四年長至後十五日甘泉鄉  
人錢泰吉序於北郭之碧漪坊

平湖蔣竹音

槐詩序

余處海昌三十年故鄉戚友多不相見平湖蔣兄竹音見余文稿心許之乃以瘦藤詩鈔寄示屬爲弁言且得讀尊甫秋舫明府詩鈔而恨得見之晚也竹音之詩淵源家學又得朱小雲觀察爲之區別體裁何待余言獨念四十年前與明府哲兄叔勉先生及嘉善陳範川編修同校文於潤州相處卅月範川與余暇輒縱談叔勉端坐靜聽時出微言輒有新語足以解頤別後遂不相見至今思之如旬日事今京口烽煙屢警而余與竹音猶得以詩文相賞於鄉里之間雖不得見若在一室豈非幸事乎夫人世推移若駒過隙可以駐景者惟賴文

字竹音勉之矣

徐晴江遺稿序

庚申閏三月稿

余初至海昌時名冠一黌者爲俞霞軒興瑞徐晴江開業皆樂與余遊暇輒講論不倦已而霞軒以優行貢成均未幾謝世歲甲午晴江舉於鄉至京師館於儀徵阮文達公家見聞益博數年歸亦謝世兩君皆年少醇謹無子弟之過長益敦厚處儕輩間訥訥退讓發爲文詞數千言搖筆立成若有宿構老儒碩學驚詫其才藻而皆未及中壽不得竟其用嗚呼悲已霞軒遺稿其子少軒解元嘗屬爲序而未果今攜至楚南矣晴江詩文嗣



子又江茂才搜羅散佚之稿彙萃成集屬爲訂定留齋  
中逾年屢讀益有味今年二月倉卒移居先隴之旁去  
海昌不及百里而人情向背渺若山河回憶三十年前  
冷齋過從之友若晴江者已如羲皇上人杳不可接嗚  
呼此不獨學校之盛衰足以動人慨歎者矣乃書數言  
俾又江慎藏之

秋牕讀畫圖題詠序

余聞平湖朱純庵大令名久矣大令好蓄名畫得宋劉  
松年人物畫卷尤寶愛之因繪秋牕讀畫圖以寄其意  
三吳名流多爲題詠編纂成集屬余序之余旣未得從

純庵觀所藏畫諸君子題詠亦未盡讀也逡巡累月不能下筆時取純庵與其友所爲餞春詩讀之想見一時觴詠之盛恍如置身讀畫館中展卷品評相與晤對也憶二十年前嘗往來東湖之濱所覲皆畫境也今純庵與諸君子酬唱之所若味琴室橫山草堂者惜未得一至焉不知東湖勝景諸君子收入詩卷之餘尙有待於畫手之灑筆否耶夫畫之理微矣狀閒遠之情通無言之旨千載而下有若覲面吾意劉松年所畫廬仝烹茶圖大厯十才子圖見於前人題識者倘得好手仿其意以寫純庵與諸君子讀畫之雅集其足動人之想慕必

有勝於詩若文所稱道者矣純庵所爲圖視暗門劉果  
何若耶余不識畫理又拙於文詞純庵承其從祖小雲  
先生家學畫書詩皆人能品暇日相從談藝必有足以  
益我者純庵肯爲我傾寫其所得否耶

蔣母節孝曹安人五十壽序

往歲海昌友人助余纂備志於守節婦女采訪詳慎所  
錄無慮千餘人其旌表年例已符者旣達於大府得  
旨允旌矣咸豐元年竊自念衰老將引退見存節婦  
年未五十者旌揚之典余不及待也乃詳具事實請  
學使吳縣吳侍郎題扁以表其間凡一百十有五人破

石鎮蔣君霽峯之配曹安人與焉於戲余往來蔣氏四十餘年及見霽峯之有室豈意二十餘年之後乃爲其苦節之賢婦撰事實此真感不絕於余心者矣雖然志乘所錄節孝婦女其大端則曰孝於舅姑曰和於娣姒曰教養其子孫其孝於舅姑何若和於娣姒何若教養其子孫何若余所親見而深知不待友人之采訪者千百人中不數人也若曹安人者其姑則余族兄之女孫歲時得見者也其姑之兄館於其家最久則余之師也安人孝於舅姑何若其姑時言之孝於其姑而推及於姑之兄則我師時言之若其與兄娣之婦徐安人

其撫教其子寅昉何若余所習聞也論次苦節之事實  
宜莫余若也志乘特其畧爾夫女子之行不及乎閨門  
之外而家之興替子孫之賢否感召應驗若決蓍蔡安  
人今年五十矣於例當旌正月八日其設帨之辰也  
余乃諗於眾曰安人以孝慈儉勤成其家無待余言也  
前此三十年安人憂勞危苦之情非今日所宜言也今  
日者寅昉率其子爲安人壽安人俛仰今昔當有不能  
已於懷者抑思賢子承家諸孫林立兩房嗣續之重一  
髮千鈞之係伊誰之力而能使蔣氏之宗祊安如磐石  
也安人引觴自壽以釋數十年憂勞危苦之思乃其宜

也聞余言者皆曰然乃書以爲安人五十序異日旌揚之 旨下尙當與諸君子共晉一觴也

金岱峯八十歲重宴鹿鳴序

金岱峯兄爲臨安訓導改選教諭及教授温州待士誠信訓課不倦數十年如一日士多感誦之道光丁酉之歲創建臨安縣學尊經閣應奎樓請祀撰著十三經注疏之儒屬余記之余謝不能岱峯曰何靳也余曰此兄政事之肇端耳待二十年後兄之政日益舉我將覩縷記之以爲八十二歲重宴鹿鳴之文岱峯年二十一舉嘉慶庚申 恩科鄉試於例當待後六十二年辛酉正

科重宴鹿鳴故余與岱峯要言若此及歲甲辰岱峯偕訓導江山朱樸山家麒重建德義祠節孝祠自爲文以記不余責也歲庚戌推陞温州府教授臨別又索余文余曰息壤在彼不忘也明年爲咸豐元年仿臨安舊事祀經師於府學尊經閣並倡字祖之祀以祀黃帝史倉頡沮誦皆自來學校所未有也後又別建倉聖祠改建考棚瓦屋皆勸成之四年春夏大水請於府學設局煮粥以待餓者城東南鄉距學遠日擔粥往餉時省視之自四月至六月未嘗一日怠府縣舊有倉九所儲穀十萬餘石歲久盡廢請於府縣以明倫堂西偏隙地十畝

作倉房五間閒可儲穀五百石以備旱潦士民踴躍從事踰月告成明年增造六間管倉人住屋三間鉤稽出納錢不虛靡自是勸捐儲倉之穀數年而有成八年岱峯年七十九五月告歸秋日與余相見余笑謝曰兄之政成矣余文則猶有待也今年特開恩科郡人乃援桐鄉馮孟亭侍御浩舊例以請於是岱峯年八十得重宴鹿鳴猗歟休哉屈指百餘年來我兩家自曾祖而下科第相繼皆已六世得重宴鹿鳴自岱峯始可謂難得之盛事矣然使岱峯之爲校官亦若余竊祿二十七年錄錄因人無所創置則余今日不過敘述岱峯得享大年



遭逢 盛典以爲稽古之榮交游之光寵以誇示於閭里爾雖欲踐二十年前要約之言未敢必踐也今岱峯之子若孫接踵爲縣令當知老翁以縣令爲難爲力辭而不爲而學校之美政若此余特舉其大端耳皆今之縣令所欲爲而不能爲亦或能爲而不欲爲者也吾願勉成老翁未竟之緒各有實政報最於所治之地我未衰朽尙當詳記之以告能文者待老翁九十壽辰作文以進康爵也

陳笏魚

縉

詩稿題辭

海昌詩藪也而渤海陳氏著述尤富素庵相國浮雲集

星宿之源也岱青司李與袁堂集多感時紀事之作支  
派漸廣矣若樸庵文學之杜律詳注宋齋教授之讀杜  
隨筆宋十五家詩選則導人循流溯源庶幾不失塗轍  
者歟笏魚稟承家學又得陸泐山爲之師兩蒼小魯昆  
季爲之友壯盛之年斐然有作其於渤海固當駕高浪  
揚洪波奔騰萬里令讀者望洋而歎安能測其涯涘也  
哉浮雲集余嘗讀之又喜誦習宋齋之詩選然終不能  
得其源委蓋所習不專也笏魚專力於詩博觀眾家以  
匯於一猶百川之學海也其於家學所得必深暇日與  
泐山父子相從講論者不知其何若今讀養吾愚廬之

詩益令我神往於鵬墩湖銀魚灣之側也已

牟冊如大令

溫典

小像題辭

登州府於春秋時爲牟子國有牟山牟城牟平城皆因  
牟子而得名今棲霞縣牟氏科第仕宦相接踵其由來  
遠矣咸豐五年浙西大旱海甯州尤甚大府選能撫綏  
其民者冊如牟侯來權州事實能勞來安定之民以不  
困後漢時牟平劉榮祖以明經舉孝廉爲東平令仁惠  
爲吏民所愛後遷會稽太守簡除煩苛禁察非法郡中  
大化牟侯之爲政可希蹤其鄉先生矣余寓居海甯竊  
比山陰老叟竟夕得安者亦侯之力乃題圖畫之首以

見一夫得情萬室鳴弦信有如范蔚宗所言者

四品銜兩淮候補鹽運使司運判馬君家傳

咸豐三年春粵賊陷揚州我郡人與石門馬氏有連者驚相告曰不語死矣不語四品銜兩淮候補鹽運使司運判馬君自號也或曰馬君無守城責可不死或曰君夙樹立名義嘗作忠孝詩以勸人往歲暎夷之亂於鹽運使坐中昌言曰城苟不守公當死難眾皆失色今處危城中不能殺賊其必死已而其家得君城破前數日書多決絕語以是益知君必死矣君之子縣學生恒昌屢至揚州訪求蹤跡不可得十一月我師克揚州知君

定死而傳聞異詞久之乃遇君寓舍之鄰某言城破時君與議敘八品銜陳長生率眾抵禦眾潰長生及民勇張秉鑑死之君與蘇州人孫守原同被執罵賊不屈遂遇害棄屍城河二月二十三日也年六十四恒昌乃泣告於甘泉知縣如隣人言縣訪問得實爲請卹如例城河積屍官以時斂埋不可識別乃以君家居時衣冠招魂城側迎以歸五年十月十三日也君諱國棠字紀南本生父澄懷監生事載縣志孝義傳叔父澧蘭早卒君爲之後石門馬氏世行善於鄉君所施尤廣嘗偕伯兄召棠從兄文楷梧鳳建宗祠置義田纂家譜族人賢之

嘉慶二十年捐米救荒君之力爲多其明年於縣之洲錢鎮玉溪鎮創接嬰堂捐錢四千緡爲貲本歲入贏息以收棄孩道光三年大水縣集資撫恤至冬止君於四年春出米一萬七百餘石爲餓者展兩月食君之財幾罄矣而好施之心嘗若未慊後十餘年又以家資建老人堂養八十以上無告者縣人歆其德公舉孝廉方正君堅辭大府以助賑奏予四品銜八年例授鹽課大使分發河東管委署某地眾以爲利藪君卽辭去十四年例授鹽運司運判改發兩淮以好直言忤上官需次久不得一展其懷抱倉卒遇亂卒以兵死嗚呼可哀也已

余聞君義行心誌之數十年今知君能致死於危難之中其志義益可重乃因恒昌之請采眾論而叙次之贊曰君傾其家財賑救鄉里蓋古鍾離葉陽之流所謂助王息養其民者也假令得尺寸之柄則陽施長世匹於罕樂矣乃久困下僚所如不合卒遭賊兵不避義死其自誓有素也若陳長生張秉鑑孫守原者其死亦烈某又言守原之母宋氏聞守原死卽自經匹夫匹婦義不貪生有學士大夫所難能者嗟乎赴河負石烈士甘心君卽糜骨城壕我知其勇毅之氣必當馭清風駕雲車入修門而反故居以享社祭庇其里閭也

鷹硯銘

鷹也而以爲鷺伊征鳥之善化寶貞石而不磨  
咸豐丁巳嘉平之月得金紋星雲硯歙州上品也六  
舟爲分書景星卿雲字池上有鷹眼花誤認爲鷺鉤  
摹大令字於硯背卒寶盦銘之刻將成而中覺磨改  
恐損硯質書銘於匣以自解

又銘

以爲鷺而實鳩喙雖兌而能柔勿利口之羞  
或曰池上所刻乃鳩也又作此銘

先大夫嘗賜歙石羅紋硯於大興官舍幕中有海鹽



老翁忘其姓矣借用踰時旋失去童稚昏駭有負傳  
付今五十餘年猶自恨也弱冠後得交吳蘇邨兄教  
余辨別硯材先後所得若干硯皆端溪精品然思歙  
州佳硯不可得前年六舟上人贈余金紋硯今年又  
贈廟前紅六舟謂程牧庵言廟前紅廟後青皆美石  
近讀程易疇瑤田記硯謂廟前洪古老日  
傳不知何所如程易既得兩歙硯不必他求矣然金  
疇說則紅似當作洪紋太大廟前太小意猶未足今得此星雲硯大小適  
中額上龍首宛然池中有異物形亦螭龍之類皆金  
文也竟日摩挲實衰年大快事後之人以余爲鑒勿  
輕借人警翁漫筆

謂硯必畀余後人何所見之不廣也倘有得余藏硯者以硯質之良愛護拂拭而不磨去題字亦可感也佳硯何忍屢磨治所以鄙人刻硯雖誤而存之甘泉鄉人又識

洮石硯銘

咸豐戊午三月得此硯銘之曰

寶侔洮瓊如雲下田可耕

五月旣望得從兄襄山中丞隸書楹帖越數日知

兒子

應溥

蒙

恩記名補用軍機章京上距兄入直時逾六

十年矣銘硯示勸并楹帖畀之

雅範德言

楹帖中語

植其本原師法綠天

兄京邸書舍名

奉筆慎旃

蔣氏月池硯銘

我與蔣甥書同師寶茲龍尾兄所遺濡染大筆曾見之  
缺月不圓吾已衰得如此硯無盈虧

此爲蔣甥霽峯所藏五硯之一其兄潞英所遺也余  
與霽峯同學書於家特齋先生越三十年寅昉奉硯  
乞銘感而有作咸豐戊午仲春

摺疊竹扇骨銘

風人以風孰居其功削磨堅節以就渾融恒類聚而不  
比任展舒以從容噫是惟有君子之德雖鳳舉於夏日

而不妨龍潛於秋冬

甘泉鄉人餘稿卷一

甘泉鄉人餘稿卷二

嘉興錢泰吉輔宜

閑心靜居詩

甲寅九秋與蓮溪同遊范蠡湖蓮溪成二絕句

懷舊之思溢乎楮墨冬日倩吳江陸星巖

潮

寫照張子祥

熊

寫景爲南郭聯吟圖各存一

幅感題四首

沈侯已踐還鄉約我尙他鄉賃一區雙管生花賴張璪  
畫中得其住城隅

詩壇盛記百年前南郭新詩有合編可惜故交半零落

聯吟那得繼前賢

雍正戊申族父少宗伯公與陳乳巢朱偶圃祝豫堂王穀原諸先生合訂

詩卷曰南

郭新詩

范湖把釣憶秋風老友難忘學圃翁

謂金岱峯

孤嶼亭邊應

悵望天涯酬唱與誰同

總角沈錢誇里黨兩家大父行相知蒼顏皓首還同社

髣髴桐陰夜話時

從祖芭塘觀察公與蓮溪大父又希先生有桐陰夜話圖亦各存一幅

吳縣徐覺回

榮

秀水沈燭門

照

與我家曉庭

聚

朝

為蔣寅昉合寫梅花便面時乙卯七月同

在五研齋看畫走筆題句

曉庭畫梅淺著色徐翁老幹燕支新燭門強之乃肯畫

以淡墨寫梅花神蔣生喜若得尺璧不獨師友兼懿親  
三人相違各南北偶然會聚難兼旬興來合筆自寫意  
胸中高曠清無塵亦若老梅枝格古縱橫交互成一身  
坐中論畫劇歡笑盡忘老少忘主賓我詩記事差不俗  
以疥畫背請勿嗔

常熟俞芝軒廣文寄贈家藏古銅器搨本及姜

西溟書文賦石刻屬題味蘭圖

俞君未識面幸與長君遇文采想清門庭階森玉樹攜  
示味蘭圖殷勤屬題句奇卉稟靈德君子謝外慕芬菲  
襲予襟無言愜幽趣家傳古銅器重之若連璐搨本以

見貽賸以士衡賦用訂金石交文章得攀附何時翼京門抱琴來曳屨一寫同心言執手話情素

六舟屬題湯雨生將軍所贈畫梅卽次將軍自

題韻

眾生苦顛倒孰肯解其縛將軍拯物心欲使出溝壑老

梅得成柯寒不受雪虐

自序云琴隱園盆梅得地成柯回念其束縛之窘慨焉贈之以

詩

那知琴隱園悲風頓衰索城郭人民非翔舞歸來鶴

幽香伴忠魂苦惱乃極樂平生金石契高僧共詠謔遺

墨佛護持九霄氣磅礴

甲辰之歲湯雨生將軍手書詩幅以寄蔣生沐



丙辰夏日生沐屬題

手書近作筆如飛比似元戎羽扇揮

元戎知健飯羽扇未停揮幅中句

難得江郊烽火遠

漸欣烽火遠亦幅中句

林泉幽賞暫忘機

重看琴隱曾藏帖惆悵蕪城感廢園不及北平孫少宰

暮年銷夏閒閒門

將軍以退谷所藏羣玉堂帖寄生沐媵以詩幅

得永奉無疆瓦當硯贈李實齋

文杏

媵之以詩

柱不以陶鼎不玉硯當用瓦鏡用銅以瓦爲研非本性

昔人著論殊未公不見青州熟鐵廣南竹適用乃與端

歛同況乎古瓦當文自秦漢豈異墨海篆帝鴻李侯落

紙日萬字穴硯一篋書益工傳家自有小瀛海

我師介石徵君

有端溪硯寶之不敢輕磨礪邇來瓦當圖傳竹田里王  
日小瀛海耕有竹里秦如見綵筆題明虹甲天下瓦摹二鹿壽存  
漢瓦當文存當字冠八風中郎辨別左右將官署省識都司空恍若  
黃圖列三輔急思訪古細柳之北甘泉東綿綿遠道夢  
不到愛而不見心忡忡天公默憐好古癖特退壁友飛  
落闌闌中俗眼熟視若無睹李侯見之直欲傾錢筒市  
人居奇忍不予畫餅未足飢腸充我思永奉意取永保  
用無疆頌禱詩義通李侯著書富歲月天錫異硯旌專  
攻秦城詎肯易尺璧魯寶自合收大弓鼓勇掬取急持  
贈不使劍氣埋於豐我慙州年守遺硯識字僅可欺童

蒙願此瓦當得伴真手永不壞助修五鳳獻賦長楊宮

題蔣穎士齋尹眾味菜軒圖

蔣君知我久不待名姓通我文苦淡薄見謂拙處工知

君所嗜好與我臭味同家世飫堂餐君爲文肅文恪後人而有寒

素風仕宦不求達胸次江海空中歲樂高隱避世王君

公來就密庵養元時海昌判官張天爵築密庵以奉其父崑山州同知子英穎士今就養甘亭

少尹官舍歲儉祿不豐高懷任寒餓萬卷飢腸充我老作寓

客蹤跡如萍蓬與君共藜藿願作鄰舍翁

朱松岩文浚招同人賞牡丹張燈劇飲張墨林

茂才兆榮賦詩索和漫次二首

護花欄巧債般輪鏡影花光月共鋪勝侶僧儒並招致  
六舟上比鄰婦稚任攜扶屢聞近事心如結頓有清遊  
興未孤憑伏明燈圍綺席霧中老眼不模糊

冷齋手種見萌芽卅載春風借作家未許穠姿鬥繁豔

學舍所植牡丹僅一種

幾曾邀月醉流霞志分榮辱初難定看到

兒孫更足誇花下書聲勝歌管況教勵志有張華

松岩延墨

林督課家塾

同里曹薺香茂才咸熙於歲丙辰屬張子祥畫

采剡娛親圖未帀月母沈夫人棄養戊午之

歲子祥又爲寫思親圖秋九月薺香攜示兩

圖感賦

春暉那可駐一日亦天賜娛親曾幾時卽墮思親淚衰  
老見此圖彷彿童稚事倏過五十年難寫萬端意吁嗟  
畫裏容猶勝夢中思況君守三徑園菊未顛顚慨我望  
舊閭積齡掩異地佳節感重陽牽衣憶嬉戲先母誕辰  
爲九月八  
日

錢塘汪少泉博士

崇熙

爲謹堂少師曾孫菊叟

尙書之孫先曾祖文端公與少師同官同居  
最久先祖與尙書爲總角交先大夫宰大興  
時尙書兼京兆尹視如子姪不以屬吏相待

泰吉年十五曾得謁見少泉長余三歲時聞  
先大夫講論兩家不通消息五十年矣已未  
正月少泉將適館吳門過訪語舊見贈一律

疊韻次答

房杜諧心跡

用先曾祖輓謹  
堂少師詩意

劉廬是世親竭來肯相訪

不比託交新海畔幽棲地吳趨旅食春暮年同作客故

里憶明眞

明眞里見  
拾遺記

兩家大父行少小卽相親君守傳衣舊吾藏遺墨新少師

公尙書公遺墨聽談祖庭事重見

帝城春坐客多年少那知情話眞

附元作

交深邀

帝鑒孰比兩家親

昔兩文端公交誼最篤  
純廟所深知

久隔關心

切相逢識面新追思前日雨同話故園春握手情無  
限其中自有真

伊少沂司馬

念曾

頻過寓齋投贈書畫賦謝二

首卽次其七十自壽韻

與君一歲校行年賢者揮毫墨綵鮮

少陵詩與兄行年  
校一歲賢者是兄

愚者

作隸法存中古後畫梅意在未開先醉時信手參

懷素世上機心謝計研可惜綠天盦寂寞比來不共坐

僧齋

謂六舟

相逢莫怪兩相知早歲曾窺逸世姿

嘉慶庚辰識面於京師

塞屋

破書容我老承家美政讓君爲使車頓轡頻分詠朝籍

聯班共論思握手歡然重話舊石交二父訂衡疑

尊甫墨卿

先生與先叔贈侍講公從兄襄山中丞同榜進士嘉慶戊午與先叔學士公同典楚南試訂交尤深先大夫宰大興時先生尙未出守屢相過從

金眉生觀察

安清

屬題西湖延秋圖率賦以應

使君合作西湖主靜對湖光笑口開試問孤山雙白鶴坡仙而後幾人來

西湖我已隔三秋好借丹青當臥遊想見淺斟低唱處



一時裘屨儘風流

哭唐茂午孝廉

兆榴

四首

豫教宗潢選博聞

茂午考補宗學教習

未容奏頌氣凌雲最憐病

骨支離候猶誦嚴親得意文

阿翁辛山方應鄉試歸

遄歸擬共侍晨昏夢斷香消只淚痕斗帳紅羅垂四角

獨眠愁病竟何言

茂午有家室乖離之恨

重泉倘遇我家兒

謂子方

話舊論文慰所思應羨君家親

老健莫教苦憶我年衰

憐我殷勤辨魯魚一編爲譜到官初

茂午爲余撰校書譜

何人身

後文堪託更嬾研朱讀舊書

題沈南溟茂才

鯤

遺照用許辛木戶曹

楮韻

舊時梁燕去忽忽剩有團焦結構工記得花閒留客坐  
品泉頻爲展茶籠

楚醪欲奠雨蕭騷重詠秋深發唱高

南溟有秋深詩傳誦

父子才

名傳紫府鵲袍應換鷓鴣袍

南溟久困場屋哲嗣小溟茂才早世不遇

松陽蔡卽三

志俊

餉雁蕩山茶賦贈

玉川得新茶宛見諫議面蔡侯與我未相識持贈雲芽

佐藥膳爲言曾到碧霄峯邇者訪友來禾中

沈倩雅宜官松陽教

論時與卽山少川兄弟訂交

五珍遠莫致一串聊相供我聞君家兄

弟不獨勇成癖捍衛松州資碩畫山鄉暫別留水鄉戰

格初停選茶格故人樂城昔抽簪圖經贈我成奇探

沈雪

門自樂清歸贈雁蕩山志藏篋中有年矣常時夢想芙蓉庵諾詎那禪誰同

參何日從君訪四谷飽啖波淩看雪菊不勞供億議山

中明侯一元有雁山供億議更向龍湫尊者乞豨肉亦用雁山事卽山謙有松陽豚

贈之

憶舊日閒居四事 辛酉

檢書

萬卷亦奚爲如衣裳在笥逾時一被服那用祈多積吾  
聞賣書人昕夕手排次坐臥百城閒古香恬寤寐長恩  
啟其心不讀亦益智況我父兄遺少日所拜賜心冀四

部全亦嘗百方致友朋憑締交生徒當委贄開篋見留  
題兒曹知舊事忽如別故人難制盈盈淚卅年常整齊  
一日盡棄置敢望守墓人保護同遺器所藏五十餘櫝分存先六世祖及祖父墓屋中寓廬所攜僅數篋

裝帖

美人到貧家只合淡素妝書生得名帖那有錦繡囊把  
玩冊屢做濡紙多脫漿世業有周老海昌人父子爲我裝  
毫髮勿差訛點畫存鋒鏖西子去不潔態度增輝光蛟  
龍得雲雨作勢從風翔竟日坐忘疲領略翰墨香避地  
幸未失對之愁中腸肱篋近可畏安得石室藏蘭亭竟

殉葬亦屬文字殃楚弓楚人得愛者任取將

滌硯

平生金石交死亡迭聞報

上元朱述之郡守同里金岱峯教授海昌蔣生沐廣文數

月間先後逝世

亦有兄弟行不得其老耄

呂泉拜亭兩弟

石兄幸相隨

稍稍存舊好所愧文字鐫似鑿渾沌竅

所藏多刻銘

一事語

石兄庶幾無罪告洗滌常如新不使塵土冒滌硯并澤

匣光采可照耀如埽除室居以安我同調吾衰失舊容

硯不改古貌甕水恆自提斗酒還自勞比聞海濱州毀

及白馬廟僧房所留遺何人出於淖

六舟晚歲儲硯甚夥

閱肆

海昌多藏書曾不設書鋪但有骨董攤小巷時一遇最愛余生家行飯常緩步留連如賈胡入室左右顧器物檢零星書冊出朽蠹欣賞輒得之錢約杖頭數客歲見余生向我道所苦遷徙無定蹤何人此焉駐相對頻太息吾亦厭家具多累緣多藏昔者曾未悟無聞亦無見今乃安吾素所恨集上街已爲馬糞汙邵城集街百年來書鋪骨董鋪鱗次今不可問矣

贈餘姚廣文黃巖葉桐齋

汝封

二首

忽作姚江客欣逢葉石林論文驚俗耳話舊感予心君與余皆嘉慶戊辰爲萍鄉劉金門官保取充弟子員念宮保愛才之篤其語遺事晚歲交難得齊

年情更深

君長余九十日

何時隨采葯華頂結同岑

乍來聞士論未見卽心親北郭難招隱南雷幸卜鄰

余寓

學旁黃氏

危根依客土舊好隔前身羈旅嗟何託相過不厭

頻

題吳仲圭竹譜卷

并序

元季寇亂相仍海鹽未罹兵燹遠近高人多辟地焉桐廬姚氏桐壽樂郊私語所由作也吾郡今無可措足者海昌亦孤城獨峙爾寅昉與余同寓慈水攜觀至正十九年吳仲圭竹譜卷感賦

吁嗟乎故園平安語不聞有竹已等申池焚秋聲可聽

在何所異鄉看畫得墨君

我亦有亭深竹裏也思歸去聽秋聲仲圭錄趙文敏句

墨君落落掃俗態以趣爲上入三昧湖州之書亦抗行

息齋之譜或相配籤題藏弄瓠尊翁

蔣翁少宗伯公收藏題籤用瓠尊小

印公中年自號也

翁畫竹與梅蘭同元章萬玉圖未見

亦蔣翁所藏

此卷意外今相逢故鄉何日朋簪盍樂郊歌詠相酬答  
平生未訪梅花村今宵夢遶梅花塔塔中道人眞絕倫  
橡林畫隱終其身那能天地干戈際不作東西南北人

### 海鹽渤海陳氏雙烈詩

昔有高愍女今有陳貞姑

琴齋廣文其泰季女名貞儀字璫卿年二十四字同縣朱

康鳴呼弱女子烈勝偉丈夫罵賊激肝膽殺身完體膚



長嫂亦神智

仁和王友山女琴齋長子德姓室

從容捐其軀次嫂誓水

死得免節不殊朱齋傳碩學累世多通儒阿翁吾畏友  
紀實語不誣捍又交下矢貞貞不渝大節姑嫂同真  
氣天壤俱雖死必殺賊盡掃彼逆奴二月城破時我初  
豐山居爭傳渤海事眾口若合符同時遭難者趨死非  
一途豐山陶氏女嫁於城中徐小姑娘尙待字侍婢年方  
雛握手同死難投水不受汙我時寓於陶見屍迎歸艫  
轉徙俄倉卒未能記大都願附雙烈傳

許辛木戶曹楮撰渤海雙烈傳

用以告董狐更煩訪國殤大書而特書

慈谿馮薇史文學

惟恕

招飲擷紫山房次見贈

韻二首

當在題吳仲圭竹譜卷之上

無端會合果何因把酒論文覺有神願向慈湖求實學  
黃東發後得傳人

早慧佳兒有夙因十齡腕力已通神

薇史子善長仿顏魯公家廟碑作逾

尺字筆力頗健

更教書讀五千卷始信西溟第一人

喜八妹至

有引同治壬戌

妹嘉慶丙子嫁南昌方氏初居吾郡旋侍翁姑入都翁  
沒歸江右妹壻賓甫貳尹官粵東廿餘年挈家以行病  
歸而歿妹與余不相見者四十餘年男女兄弟行余與  
妹最小余今年七十有二妹亦六十六矣客臘余至江

右鄉寓卽欲往省垣視妹臘底寓甫定春初病作首夏  
小愈六月又作妹亟來視余病中握手而哭幾如夢寐  
兼旬話舊半雜悲歡感賦四首

老病經時甚衰容那得舒乍逢難識我話舊轉愁予消  
息家鄉斷奔馳盜賊餘未乾同谷淚且緩大雷書

弱小趨庭事今惟妹畧知同深孤露恨頓有履霜思遠

嫁初難料重逢豈易期京華一相見正值侍喪時余庚辰秋

至京未數日容  
齋學士謝世

慈姑養初畢少子病先亡舉室勞千慮空房對兩孀庶子

慶雲客臘病逝次子  
早沒長子四子出嗣家規猶楚楚人事感茫茫南海曾

從宦歡娛亦愴傷

爲余調飲食餅餌勝烹鮮少博翁姑喜今承手足憐事妹  
翁姑手製小食甚精余嗜煎酥蒸餅妹排日以食余功逾上池水病起古稀年幾  
日同談笑愁知別後牽

甘泉鄉人餘稿卷二